

MOU pa construccion di Bahia Principe Don Pablo Collection ta worde firma durante Carubbian Festival

ORANJESTAD (AAN): Diahuebs awor 16 di october lo conoce un momento grandi pa loke ta futuro desaroyo di nos isla y den e caso aki specialmente pa San Nicolas. Gobierno di Aruba lo firma e MOU cu e grupo Piñero cu ta popietario y desaroyador di e hotel cu lo bin na Sero Colorado Bahia Principe Don Pablo Collection.


Presidente y propietario di e compania Sr. Pablo Piñero mes lo ta na Aruba pa firma e acuerdo di entendimiento aki durante un celebracion extra special diahuebs anochi na Carubbian Festival.

Minister Oduber a indica cu despues di 7 luna di negociacion y conversacionnan cu a tuma lugar cu e grupo di Bahia Principe cu a culmina luna pasa na Republica Dominicana, “mañan diahuebs 16 di october nos lo firma e MOU pa por cuminsa desaroya Sero Colorado na februari venidero (2015), pa na october di 2016 haci apertura di e liña principal di Bahia Principe, Don Pablo Collection”.

E lo ta un propiedad di 350 camber den e promer fase y na momento cu esaki ta cla lo tin e opcion pa e di dos fase sigui cu ta conta cu 200

camber adicional, yegando asina na un total di 550 camber. Minister Oduber a duna di conoce cu e inversion di e promer fase lo ta entre 80 pa 100 miyon Dollar y e lo tin un duracion di 20 luna di tempo.

Na luna di maart Sr. Adolfo Castellanos, representante di e grupo Piñero tabata na Aruba y a conversa cu e mandatarionan unda cu a expresa e intencion di desaroya un hotel na Aruba. A cana na San Nicolas y a splica cu e area di desaroyo na e momentonan aki unda cu Gobierno lo por acepta pa tin un hotel all inclusive ta na San Nicolas. Durante e encuentro aki e interes a nace y e propio doño di e empresa, Sr. Pablo Piñero a bishita Aruba y a reuni cu Ministernan Oduber, de Meza y Sevinger, caminda a expresa interes hopi grandi pa por desaroya na Aruba mirando e calidad di e destinacion. Teniendo na cuenta esaki, a expresa e deseo di bin cu nan coleccion principal cu ta esun di Don Pablo Collection cu ta



di 5 strea dentro di all inclusive.

Despues di esaki tabatin diferente conversacion y luna pasa Minister nan Oduber y de Meza a haci un bishita na Republica Dominicana pa conoce 5 di e propiedadnan cu nan tin na e pais ey. Despues di a reuni dos dia consecutivo a yega na e conclusion cu tin suficiente base en comun pa firma un MOU pa e proyecto na San Nicolas.

Minister Otmar Oduber a indica cu un proyecto asina lo tin un impacto laboral positivo pa nos isla ofreciendo e posibilidad di trabao pariba mes na nos hendenan. Adicionalmente Minister Oduber a informa cu nan lo bay traha cu operadornan di tour local, cu companianan di

watersports local y transportacion local. Esaki lo crea oportunidad pa diferente companianan, manera entre otro car rentals por ubica nan mes pariba di nos isla y crea un desaroyo economico positivo.

“E spin off cu ta bay tin ta uno grandi pa pariba di nos isla. Pabien na tur esnan involvi te na e momentonan aki. E ta un noticia sumamente positivo pa pariba di nos isla y Aruba en general. Henter pueblo di Aruba ta keda invita pa hunto celebra durante Carubbian Festival e firma di e MOU pa construccion di e hotel na San Nicolas cu lo trece un desaroyo economico grandi pa e parti pariba di nos isla”.